

路南縣志

卷九目錄

詩文雜體

金石

兵事錄附

路南縣志

卷九目錄

路南縣志卷九

縣知事 洱源馬 標編訂

洱源楊中潤輯

藝文志

咸豐兵燹以前路邑文士代不乏人至同光以後科第寢衰
文運亦隨之而遞降然聖人之道貴乎實踐文章特其末焉
者矣志藝文

詩文雜體

七言律

星回節三台山觀炬

邑人金

冕 拔貢

慈善夫人骨已灰年年火炬過星回三台日暮舒青眼萬點星光
炯綠埃竟夕銀花供勝賞當時鐵釧想奇才千秋亮節堪誰比楚
國三閭晉介推

重陽三台山登高

前人

風雨瀟瀟菊色黃中秋纔過又重陽三台原係連年館九日尤登
萬仞崗落帽當時懷孟氏題糕此際憶劉郎歸來同志方歡飲詩
興應隨酒興狂

龍紮壩 在祿豐村
頻年為患

邑人韓晉芳 舉人

阻絕洪流一壩成泥飛沙擁水橫生無端骸浪兼天湧不盡長隄
澈底傾溜急怒驅岩石走漲高直壓岸禾行悠悠漭漭俱歸海何

事狂瀾不肯清

韻楊忠節殉難詩

張

珊嵩明學正
邑人

張許從前不顧身楊公萬里一孤臣
榮頒廟貌輝桑梓世綴科名
仰縉紳節義自來明德遠忠良
之後達才真於今瞻拜時憑弔
古柏蒼松可與倫

前題

施文袞

邑舉人

滿腔浩氣貫長虹赤手縱橫萬馬中
邊徼祈援抒秘計文臣守義
矢孤忠節憐竹箭經霜勁血染征袍
映日紅慷慨捐軀殉國難畢
陽城外仰英風

前題

五言律

李述武

河南遂平令
邑舉人

殉難思兄弟芳名震古今書生知大義
國史表丹心白骨風霜冷
孤城草木深一門同俎豆戚里共沾襟

前題

李繼晟

歲貢
邑人

彩雲萸爾一昆州記得真儒節義留
姓氏鱣堂遺講案血肝黔地
染荒邱出奇間道書何在殉難全家
骨未收讀罷有明青史盡霜
寒古柏玉山頭

前題

古風

張

紳邑貢生

屏山劍氣飛白虹紫玉丹霞照孤忠
前朝底事雖已矣異代文人
弔未終楊公高義垂青史千秋亮節
誰復同選授貴陽駐畢節霑
鳥水蘭方交誼斗大孤城聊據守橫
矛四顧驚飛熊螳螂那堪當

雷電殲厥渠魁黑乍窮詎料愚頑賈餘勇妖氛布塞石門東圍經
半載外援絕易骨而炊焰滿空咄哉奸胥暗引賊將崩大厦瘁厥
躬倉皇遣吏歸藩印義獨當關氣倍雄須臾城陷急投縲縲絕翻
要與賊攻賊不殺公公不屈詞愈相激髮愈衝可憐同室遭刃白
一十三口血濺紅先生幽繫復籌畫破賊精忠注碧筒阿弟艱難
承兄命蠟書五丸赴元戎宅溪告變推雙璧霜刀碎落玉玲瓏興
南尙餘公之子英姿飄爽走金狨酣戰奢酉賊勢解尋將父骸裂
寸衷玉骨一堆凝不朽冰魂慘淡夕陽中滄桑變換雲烟歇深幸
賢侯達上聰名宦鄉賢同建立廟祀昆州典特隆憶昔黑壓沉雲
濛羣醜奔飛急飛蓬君子自知成大義寧思樽俎祀攸崇公能死

忠家死難雲霄次第聯飛鴻吁嗟乎平原拳握仙拿常山舌吐霜
風後先輝映碧血化萇弘獨遜楊公一家殉難埋畢節永留青史
照蒼穹

前題 古風

張 綸 邑廩生

造化儲英靈蚩虬忽出没卓哉忠孝倫間世表風骨吁嗟乎楊公
同一死難臣胡爲異世倍酸心千載忠貞惟一節君家殉難十三
人遙憐忠胆光日月此身寧必畏斧鉞獨恨水藺與霑烏橫行疆
土肆剪伐畢節羣生慘如麻豺狼吮血兼磨牙臨危紛紛多戰慄
誰云之死矢靡他楊公視死猶覺小仰報君恩情未了幽繫圍中
構精思破賊情形畫分曉付弟臘丸悲更切臨危丹心猶內結惟

期畢世奏昇平一家願葬螻蟻穴吁嗟乎慷慨赴節易從容就義
難五緘書雖破雙昆心力殫迄今火掌宅溪地千載淋漓血未乾

鴉夜啼曲

古體
喻夷匪之亂也

韓晉芳

邑舉人

鴉夜啼風淒淒爾何岩畔立爾何枯樹棲一聲兩聲聲斷續千聲
百聲聽欲迷啓戶階前立山空皓月低舉頭望銀漢牛女隔東西
天上已如此人間悽復悽拔劍欲尋惡聲去窗前忽唱五更雞
鴉夜啼摧心肝人已靜夜將闌爾音何太慘爾性何太殘既經毀
巢復取子何不引吭振翼入雲端胡爲乎徹夜呼號山谷裏使人
聞之心膽寒

石林歌

詳古蹟

蔣元楷

前知州

參差突兀疇能補縹緲常飛雲色五萬狀離奇眼底生巨靈擘作
芙蓉塢瑤室璇房宛轉通縱橫四達紛難數鐵筆摩空天削成開
鑿無容修月斧龍蛇窟仰雲根穿峽圻支撐若門戶嵌竇虛張結
綺疏月夜娟娟明玉宇岩洞黝黑莫敢窺積陰神物蟠水府探奇
歷險學猱升褰裳犖确翠如組圖開人陣隱旌旗叱起羣羊能跪
乳重重樓閣自玲瓏彷彿趨蹌鳴佩瑀伏流清冷寒於冰奇峭干
霄無尺土蒼皮駁落轉光澤石狼皴裂偏多嫵白日還疑山魑藏
驚看怪石如蹲虎左拏右攫鳥道纏崕岬對面相吞吐遙岑日入
壓黃雲崖前迸落山花雨振衣天末忽蒼茫徘徊四顧羣峰俯羅
列兒孫說本奇巖巖競秀將何取剗厓歲月手頻捫數行蝌蚪文

同禹當年避世迹猶存結構依稀不可覩凌嵩躡華亦常事梯雲
躋勝全忘苦李實冬鮮是幻成翻思縮地通崑圃松風餘韻水潺
湲清音誰復調琴譜眼前屹立指難屈米顛膜拜我狂舞心耽幽
賞發長歌假以文章大塊主乃知造化鍾神秀羣玉峯頭留太古

和前韻

張端亮 學正

天根一派雲根補曠望稜稜呈色五何代星精墮大荒芙蓉亂插
山之塢斗削巉巖箭括通千枝玉笋難爲數擬從東海策神鞭更
遣五丁施繡斧八陣驅來嶺上屯縱橫布置開門戶連城縹緲列
旌旗隱伏犀軍鎮寰宇抗步纔登窄嶧峯側身轉向清虛府藥室
璇房合異區煙光爲練霞爲組手捫嵌竇赤脂凝震霖濡人迸滴

乳左垂華盖右垂纓高者揚幢低覆釜堅剛自是老鑪錘屹立何
曾混塵土鐵騎羣驅林鹿奔虬龍倒曳山腰嫵或馳罔象走妖魑
或布金沙堆粹瑀風嘯邃谷鬪雷霆霧匝虛崖藏豹虎朝望朝暾
羲馭騰夕望夕陰涼月吐紛披瑤草繡蒼苔香馥叢蘭斂翠雨遙
知太極剖鴻濛別闢乾坤恣俯仰丹竈豈無靈藥成仙掌憑將莖
露取采芝此地老軒皇刊木當年勞夏禹况有清泉複道流倒注
銀河深莫睹汲來冰雪沁我腸泠泠爲滌煩囂苦何人示我此周
行我欲從之棲元圃渺渺仙蹤不可求爲問崆峒誰是主載將筆
墨紀勝遊惜無麗句增詩譜狂呼斗酒問青天二客從余皆起舞
極目蒼茫萬壑陰一聲長嘯空千古

路南鄉土志題詞 七言古

趙世銘

鄉志善者誰爲工前有新安

新安縣志
宋羅願撰

後武功

武功縣志
明康對山撰

地理沿革

正經界人物升降判污隆秩官善惡期懲勸賦役催科念哀鴻選
舉崇黜明義利長吏權責在移風經濟名言關治理例嚴義正儔
能同我家路南五百載門有通德紹良弓久欲纂修鄉土志頻年
倥偬賦小戎重九光復初罷戰援川兩次乘長風帝孽櫓槍照南
服揮戈橫掃迅豐隆長春直搗仰天嘯蛟鼉斬斷劍光紅盾墨未
乾寶刀躍提師靖國馬復東軍書旁午日旰食焉能執筆相始終
幸逢洱源馬知事殘篇斷簡惜焦桐訪古撫今尋牒狀荒碑仆碣
披鴻蒙更與彼鄉弘農子 （楊孝廉中潤） 朝稽夕攷相折衷書成十

篇比晋乘藜燃太乙氣凌空分門別部燦列眉縱橫排纂追史公
輶軒下採備文獻前車借鑒振躋聳但願後來守土者視爲問道
之崆峒

路南鄉土志 七絕

趙世銘

鄉土陽秋莫概論萬方兵火幾能存史遷牛馬談何易仰止名山
一席尊
自慙博瞻漫從戎夙願難償述作工且喜吾鄉文獻在劬勸劓劓
仗諸公
愛國原來似愛鄉頻年戎馬走倉皇天心未願人間亂又出櫓槍
掩月光

蜀道牂牁路幾經夜深起舞拂青萍共和再造伊誰責萬里西南
戶要肩

趙氏家譜序

家之有譜與國之有史縣之有志同一紀載而其關乎一姓一家
之事則尤切要焉述祖宗之功德明昭穆之統系聯宗族之感情
胥係乎此此仁人孝子所恒注重於家譜也吾族趙氏原籍江南
柳樹灣始遷祖國卿公明初官指麾使隨沐國公英平南遂卜居
路南大屯村耕讀相承歷有年所至前清乾嘉間族中子弟業儒
者寥寥譜牒所書僅存大概重以咸同兵燹遺籍散失即高曾以
上數典幾忘若未遷滇以前江南世次更遠莫可稽矣夫爲人後

者於所自出之祖或問焉不知或語焉不詳奚以對先人而詔後

嗣清夜自思能無慚且懼焉

宗敬

生逢世亂靡獲寧居歲月難留

忽焉既耄每念家無傳譜時切疚心今已老而善忘猶幸家世源
流當日聞述諸祖若父者畧能記憶爰自始遷祖以下虔加考求
列爲圖表而以本支表附之其無碑誌足徵者姑闕待補縱未臻
完備然得是譜以資檢閱凡近五百年來祖宗功德昭穆統系皆
一覽而可知且俾同姓之人恍然於支派雖分本原自合敬宗睦
族之心當必有油然而生者其關係不誠切要哉竊願後之子孫守
此遺編隨時修輯遞推遞廣傳世無窮斯又惓惓予懷所難已於
厚望者爾

民國六年丁巳中秋日十世孫宗敬謹識

路南高等小學畢業訓詞

知事 馬 標

世界各國之強迫教育即家族之義務教育至高等小學而止所以者何高小畢業則國民之資格備普通之知識全教育均等則國勢增進焉事理通達則家庭和順焉不然者詩書之道廢學術之途荒蕘曠庸頑不識國家爲何物世界爲何事甚或蕩檢踰閑敗常亂德在國爲暴民在家爲逆子奚有興家強國之希望哉故夫高等小學者一國人民共同之程度一家子弟應受之教育也雖然強迫教育義務教育豈遽以是爲終止哉在開明各國國無游惰之民故畢業以後人人湏求相當之職業不許流蕩放佚爲

之父母者苟察子弟之才量家產之力必竭蹶以圖上進俾可達夫高明深造之域又凡學生之秀特者自有向上之志一意孤行堅苦不拔或半工半學或負笈遠遊此在各國苦學之士優爲之考之我國前代負薪編屨成就學業亦頗不乏其人也今日者諸生之強迫教育義務教育均終了矣諸生之國民資格普通知識咸具備矣可爲諸生賀尤願諸生此日矢向上之志願造高深之學詣諸生之父兄鼓勇以爲後盾毋怠毋荒勉之戒之哉

金石

凌雲閣記

前知州金廷獻

己巳冬余倅巴陵登岳陽樓獲睹范文正公先憂後樂之語見其

慨然以天下爲己任而樓遂因以不朽心竊慕焉惟時無所更張
一加整治即粗有可觀蓋巴陵素稱名區水深土厚非若遐荒僻
壤補救維艱也及丁丑以父艱旋里憂樂之念徒付諸瀟湘雲夢
間迄庚辰復任廣平歷乙酉量移路南見其城郭半荆棘田野滋
草萊心甚憂之於是築堰開渠以資阡陌治雖小補尤憂地處天
末厥田中下厥土塗泥山川阻而地氣薄恐俊傑以地限也乃謀
諸寮友紳士修黌宮立義館以作育人材復於州治後壘石而臺
庀材而閣期月落成斯樓也東峙龍山嵐光隱耀西伏獅嶺佳氣
氤氳南仰紫玉茂林掩靄北俯郊原隴樹參差間視野老荷笠還
偕學士謳吟顏曰凌雲蓋以佐山川之缺補風土之偏俾地氣鐘

靈而多士蔚爲國禎或亦可顧而樂之也以視文正公之岳陽雖
有未逮而先憂後樂願附仁人君子後故爲之記以志巴陵之初
念云

馮公堤碑記

金冕 邑拔貢

堤名馮公紀善政也公豈自謂善政而以是名哉以是名未免矜
其能伐其功也昔者馮將軍異當論功時獨立大樹下一若無與
於己則公之不自矜伐其淵源蓋有自焉然則州人士舍是別無
以名之者因實命名無可易也側聞古志并有以桓公名泉有以
范公名亭有以謝公名且西湖長堤亦以蘇公名即吾邑志鄒公
堰何獨非此意乎此數公者非微名也當時之人感其德不能不

紀其實耳州之東有河曰巴江發源於黑白兩龍潭自東而南距城里許遠近田畝賴以灌溉澤至渥也日久岸傾霖雨泛溢匪特有傷禾稼即城垣居民悉受其害公爲之惻然率衆履勘返即籌款募工選邑紳之諳練者勸其事凡低陷處築堤二百餘丈厚爲之防又植樹數百株爲護堤計俾向之懼其害者咸安之如常惠莫大焉若夫楊柳依依松柏丸丸與河水之清且漣清且直上下相映後之覽者愛其樹不啻甘棠蔽芾垂蔭南國則公之有造斯土而令人不忘者不與范公諸君子比德哉德同則以公名堤也固宜勸事者王子廷桂趙子時薰冕舅父李公瓚叔父履惠也

碧落甸死士塚碑銘并序

陳先溶 前知州

咸豐己未冬隊目李和春段美部鄉勇進勦州城踞匪碧落甸悍賊數千壓壘環攻和春美更番血戰明年正月二十日糧盡營陷和春美三百餘人皆死之賊去鄉人聚其骨瘞大塚焉越三十九年張漑徐維新兩成均乃封以石是役也覆沒實三百餘人事平有旨採訪忠義僅得姓名百三十九告於朝是塚中有骨不得其名者過半矣得其名未收其骨者有之亡其名并遺其骨者有之不得其骨亡足憾不得其名大可悲耳然是三百人同日戰沒無一降無一逃無一或生者固生同一心死同一名矣奚必一一知其姓字爲哉惟有或得或不得乃能使後之人過之輒爲之歔歔流涕不能自己則不得其名者正所以名之也又何悲焉因名以

碧塚而銘曰

三百人一腔血心同仇骨同穴千秋萬世名不滅英風烈烈

路南重修文筆序

邵毓棠

州之東南隅約三十里許有山名曰阿子龍高而無峰昔人以其平衍建文筆於山之巔由是人才輩出於同府四屬中文風稱最盛焉相傳自坍塌後士氣漸弱約百餘年矣然同治庚午癸酉兩科登賢書者亦復有人乙亥以來應試者屢戰屢北迄無一售說者歸咎於老成彫謝少年新進罕有實學是以難繼美前人固也抑知地靈者人傑風水不培人材焉得而盛乎光緒乙未年_余忝居此間講席相商於前任州黃符階刺史重修之黃公欣然喜捐

廉四十金首倡其事然雖有是心尙無成議適虹溪王興齋觀察道經州城州人士白其事王君亦慨然捐銀伍拾兩促成重修之議自此始堅闔州當事諸君幾番商榷衆論乃定丙申冬遂鳩工庀材擇期丁酉孟春興工官經三任歲匝二載用銀柒百餘兩修高六丈有奇董其事者拔貢金君雨都都司銜補用守備馬君廷彥武庠趙君汝翼廕生趙君志道廩生張君家祥金君以遜張君家祐拔貢趙君文彬落成之年歲次己亥其月丙寅官斯土者時公鴻文也公蒞任後聞有是舉亦就地方中籌款百金助之既葺事州人士以_余爲稍知始末請序於_余不自揣謏薄遂爲之序然則文筆之成謂成於黃公可謂成於王君尤可雖然文筆成矣

風水培矣文風不盛不歸咎於少年新進罕有實學不得也然有求太速者謂文筆不修文風如是文筆既修文風亦復如是者此見彈求梟炙見卵求時夜之說吾又以爲不可也且有謂文筆無驗風水無應者吾又不敢信也何也十年樹木百年樹人速效不可期也天事居其半人事居其半人事既盡可補天事之缺也若夫大易著蓍龜而不設候驗春秋紀災變而不言事應術數之說固聖人所不信至於理所在雖聖人亦不可不信焉自茲以往欲取驗於文筆取應於風水理所必然也欲人才輩出繼美前人理所宜然也少年新進能由此講求實學藉文筆爲斡旋之樞紐斯文明大啓科第大開吾又知其理所當然也

李節母潘孺人墓誌

邵毓棠

節母潘孺人者李公諱文星之妻廩生映庚映乙之母貴州松桃同知潘公號樂山之女也幼而穎慧端莊靜一戚屬間咸稱且敬焉既長益通曉女訓年十七歸文星公婦德冲和唱隨豫順古所稱賢淑媛殆不過是無幾何姑見背一切喪葬孺人身親經理胥協宜焉乃秋霜之既隕忽春露之將零文星公亦災延二豎禱祀告窮禍及三尸針砭計竭孺人籲天刲股以救方期肉成九轉之丹血化百靈之草疾可消於无妄誠相感而回天孰意病入膏盲遂傷溘逝呼天無路搶地無門孺人密購劇藥將欲仰而殉焉母弟知之勸慰再三謂所遺二子既無叔伯誰爲扶持獨不念藐諸

孤乎孺人始抑哀撫孤而言曰吾翁與姪旣死於難吾姑又死焉今吾夫又死焉昊天不弔降此鞠凶我非不能從吾夫於地下顧茲煢煢弱息零丁孤苦何所恃以苟延旦夕乎故勉從吾弟之請不即死以承托孤之重耳時孺人年二十有二遺孤二人長名映庚號夢懷次名映乙號蓮舟孺人辛勤撫育雖顛連困苦未嘗使二子廢讀恒勉以奮志青雲顯揚先志二子讀書稍懈輒叱使跪木主前朴責之至泣涕不食如是者有年光緒己丑夢懷蓮舟俱遊泮旋食餼己酉歲蓮舟復舉拔萃科民國初元蓮舟歷任呈貢尋甸永北等縣知事固知孺人之修德獲報未有窮期也孺人相夫子五年享年三十有七卒於光緒乙酉守節十五年如古井水

湛然當清光緒十年前州牧陳聞而嘉之爲之請旌揆之闡揚幽隱之義固應爾爾然孺人早已無慚婦德足稱女宗又豈待旌里表墓始知其馨香千古哉棠與夢懷蓮舟交五六年聞知甚詳故歷叙其大概如此

旌表節孝李謙妻李氏碑銘

知事 馬 標

節婦姓李氏路南西城外人父衡鑑清武生節婦幼貞順年二十適樂熙甸李生謙結褵甫三日值咸豐丁巳滇西回紇之亂邑境土夷蠡起郡縣飛檄徵募鄉兵李生適當其役慷慨從戎瀕行節婦送之曰男兒爲國義不反顧翁姑之養妾自任之越十一日李生歿於陣凶耗至節婦愴痛萬狀尋自經爲姑所覺急解救踰時

始甦翁姑環守泣諭乃跪受命矢志守節承順翁姑意奉養惟謹
家綦貧日夜紡績井臼之役皆操焉歲饑自茹糠覈具黍以進翁
姑比翁姑卒竭力經營葬具哀毀逾恆以是鄉人咸稱其孝自李
生之歿也節婦敝衣粗服屏除簪珥絕跡戶外即親黨罕有覲其
面者光緒十七年大吏以其事聞得膺旌表民國二年節婦卒年
七十有六是年十二月葬於南城山冲祖塋無嗣母弟鳳翥聚族
謀剖售遺產爲節婦營基建坊餘以奉祭祀議既定請銘於知事
馬標爲之銘曰

猗歟節婦 結褵三日 而喪其夫 椎心嘔血 以養翁姑
窮莫或變 久莫或渝 哀彼黃鵠 意一行孤 惟山有瑜

惟澤有珠 輝光燁燁 坤德之符 斲石爲銘 世風是扶

創修演武廳碑記

知事 馬 標

雲南首義之次歲余來權斯邑維時瘡痍滿目盜賊遍境閭里之
困於萑苻者焚掠之兇烤烙之慘淫恣之毒舉凡巡行所至有觸
於耳鼓映於眼簾者靡不爲之疾首痛心自惟德薄不能格頑禁
暴消患無形乃師刑亂用重之義首從事於整軍經武適奉上峯
命令嚴厲辦團於是親赴各鄉開誠告諭父老尅期整頓夫團之
設由來舊矣或拘泥陳跡適病農而傷財或敷衍目前不循名而
覈實旦夕匪氛告警所集之團不明紀律不諳機宜驅羊當狼立
見敗衄是團以衛民者反不足以自衛余甚惑焉故爲之籌款爲

之備械爲之選教練爲之闢操場由是而演武廳之建亦遂同時而並興今而後有勇知方率皆勁旅兵威可以稍振匪氛可以稍戢人民之生命財產賴以保全商旅之負販馳驅毋虞危險此數月來余所爲不惜殫精竭慮以圖之者後人見之將不以爲□乎不然者是邑之貧瘠如斯豈好爲是誇多鬥靡作爲無益之舉也哉

張公自清墓誌

王肇奎

公諱淮字自清號若溪路邑世家也少孤從學於其叔衆孚公書過目輒不忘鄉人咸以才穎稱舉止端嚴出入敬恭羣以老成相許然家素貧讀書時皆太老儒人爲針黹以供給者惟賦性孝謹

於誦讀外嘗不離親側而服勞奉侍焉時值兵燹夷匪據州城公年十三侍叔奉母避難宜良不幸匪勢日猖母及叔皆相繼遇難公以孑然之身而又激於忠孝乃奮袂從戎爲復仇計後屢瀕於危因念太老儒人宗嗣賴以續之訓而投戈講藝焉無如遍地兵戈當時幾無一片乾淨土遂至陸邑依外祖以謀生晝爲執業夜則讀書陸邑人知公者咸相器重繼念依人作嫁終非長策乃別營生以圖自立然當是時天下洶洶無家可歸奔走於馬街鹽井之間艱危險阻靡不備嘗後漸承平始克歸籍乃復致力於詩書由是而入庠而食餼而舉明經然公之志究未遂也平居嘗自慨曰我生不辰有願莫償負先輩之期望也實甚俟念成己成人之

義乃設帳授徒焉其教人也先道德而後文藝所成就者甚衆後於辛丑年奉檄赴昆明權訓導事繼調平彝尋補會澤會澤繁盛之區也風俗遜古公以改良風俗爲己任凡謁見及門弟子諄諄以倫常道德相勸勉而東郡士風爲之丕變甫經三載又奉調升署鎮雄學正其子以不堪跋涉諫阻并請解組歸本擬春間求代繼復因事遷延於宣統元年八月初五日卒於官距生時道光甲辰十一月二十三享年六十有六也東郡人士交相悲涕無不歎斯文之喪道德之不復振也公生平緘默寡言恂恂儒者處世待人皆一本於恕是以僉稱爲寬厚長者及救人之急濟人之難扶人之困則家雖寒素必罄所有而與之而事過輒忘亦絕口不與

人語常謂其子曰吾雖一命之士而濟人利物之心未嘗須臾忘所歉者心雖有而力不足耳汝輩勉之子二長曰致中次曰致和皆善繼父志克自樹立公卒後二子扶柩回藉於宣統元年十一月初二日葬公於先塋之次錄公行述徵銘於奎奎曰與公相見也晚而相知有三載之久公每爲言太老儒人殉難事輒嗚咽流涕非孝與性生何以至老猶不稍衰耶欲於孝行中求完人近世恒不多見如公者蓋純孝而天厄之使父母早喪而不得盡其孝者也自歐風東漸道德淪亡求篤行實踐之士藐不可得如公之賦性純孝踐履誠篤處世待人一本於恕其庶幾近於道乎奎平昔論文每不滿意於昌黎以其多爲諛墓之文無價值之可言也

故奎雖不文決不爲諛墓之言以污吾筆而對於公則深欲表彰之以勵末俗雖其子不以誌請亦必爲之傳紀焉盖奎雖不屑爲諛墓之文而紀實又士人所有事也謹述顛末以紀實云

金雉城先生墓表

前知事
羅贊元

雉城先生旣成墓其子金紳以渾以遜以懋來曰不肖棄養先君至十餘年嘗憾不能自樹立以承先君志墓復壞葺治之將成願得能文者傳焉敢以請先君諱雨都字瑞君雉城其號也於先大父出行三先大父諱冤其事先大父先意承志頗得其歡心先大父以餼廩成選貢咸豐辛酉先君亦以州貢選前後三十年父子相繼拔萃時論榮之而先君不色喜先君亦無畸節瑰行卓著於

時惟性耿介不苟言笑自先大父棄養諸伯叔皆力治生先君獨刮磨時習委已於學晚年益以程朱之學派自勵講學多年足跡未嘗履城市地方長官有知其名者欲見輒謝之曰予故士士亦民也敢於父母斯土者抗禮哉與諸生講至敬存誠朝夕無倦容退則危坐斗室舉其所見當世利病罄筆之書不肖兄弟不克負荷未能承繼神氣愴傷若有不能卒辭者余不禁離席歎曰有是哉此若兄弟植品所自來與慨自皇古風渺士大夫群以鑽營爲習慣即號爲高人畸士者亦但以詩書爲弋獲功名之具終南捷徑北山移文固已數見不鮮矣至於前清未造世風愈下流品愈雜但使家擁千金即不難入擁笏而出垂魚下焉者亦必納貲捐

銜以分庭官吏而睚眦鄉愚况拔萃又其時固有之官階哉先生獨棄其可以進取之資格而務篤實以求爲己之學問務使濂洛關閩不失傳人宜其後嗣之廉隅自砥也余自蒞任斯土見若兄弟不輕至署至署必以公未嘗以私謁恆敬重若今而後知若兄弟之所自來矣余歎旣終紳復賡續請曰先君尙有課讀遺傳後世先君生前清道光戊子年二月十一日卯時卒光緒辛丑年六月二十六日辰時壽七十二先妣氏李先先君一年卒以壽著不祔葬言畢如其言以表之云

兵事錄附

元武德將軍普魯駐劄路南洪武初死難封閤里伯葬玉山山下康熙四年迤東土酋祿昌縣等之亂路南有秦祖根糾夷響應總督卞公三元巡撫袁公懋功發兵討平之咸豐七年夏四月夷匪叛踞板橋知州馮祖繩遣廩生李敦彝往說敦彝受傷走免初六夜匪由板橋燒殺小屯諸村初九日燒堡子六百餘家回匪馬正宗勾結徵江宜良回匪六百餘人托言保護入城竊據設立公局挾制官長四月十六日知州遣團長嚴開文帶領鄉團千餘人攻舍賽夷匪戰敗陣亡六百餘人是時通海河西兵盛州南寶鄉父老往求姬發貴帶領三千餘人到團山住紮五月初八日夜間攻城

回匪馬正宗逃逸姬發貴與知州馮祖繩駐紮城內夷匪回匪疊次攻城皆戰却之擒殺數百官兵畧有死傷八年四月初八日知州馮祖繩與姬發貴謀分營紮大壩大樂台等處一日夷匪圍攻大壩甚急姬發貴帶兵救援戰久被創死降匪傅六斤本隸姬發貴部下發貴既死遂謀叛盤踞州城困知州於官廳橫殺城中士民歲貢徐士達及其子徐彪皆被害初八日賊數百由板橋來將入城與六斤合歲貢施憲章率子道濟集衆禦之賊敗走施憲章追至板橋住紮初十日賊大隊來攻隊長馬春陣亡憲章父子均戰死同施姓共亡九人道濟妻聞難服毒以殉舉人徐彥間道往省請兵奉委營弁余嘉樹帶兵三百名赴急傅六斤擁所劫財物

出走至陸涼之母雞山匪黨錢發有等截殺六斤分其財物十月夷匪錢發有率回匪蜂擁入城臨安練日龍發率路南漢人於二十六日夜間擊殺夷匪回匪數百人發有遁走知州蔣維鏞隨接任有夷人趙發者幼無賴住州之東海子十二月十二日勾串蠹役聶升弟兄爲內應梯城而入困知州蔣維鏞於內室大肆屠戮遂殺舉人徐彥廩生張體寬黃縉趙璋黃汝蔡黃繹李敦彝附生李詩趙時雍等并男婦二千餘人舉人黃大章自芻夷匪楊輝南倡言留官以繫人心乃不殺知州蔣維鏞而羈縻焉諸匪遂深溝高壘以爲久踞之勢時岑公毓英署宜兵縣事偕翼長何自清率兵來勦賊分南北兩路而進自十年四月進兵攻至七月毓英率

兵由北山而進自清率兵由南方板橋而進自清攻至南門賊卻走知州蔣維鏞詣自清自清疑其降賊殺之并殺訓導李兆驚岑公繼至遂攝州事旋委宜良教諭劉勦護州事州民漸次歸業自是之後連復澂江等縣烽烟胥靖人慶安瀾然卒不能復追嘉道之盛雖至今日覺生齒漸增疆理日闢已非復昔日亂離之景象然文化竟因之一蹶不振可慨也夫